

興城縣誌（民國）二

興城縣志卷之四

教育

學宮

附櫺星門考

祀典

祀位

祀儀

附祝文二

關岳合祀典禮

附祝文一

儒學

書院

教育公所

興城縣志

卷四教育目錄

教育會

學校

社會教育

報紙

教育成績

興城縣志卷之四

教育

泰西風尚物質文明歐化東漸不脛而行天生蒸民秉彝物則不
有道德其何能國右文興學重道尊師染藍琢玉功在始基棧樸
菁莪人文是作栽者培之一樹百穫述教育

粵稽周禮大司徒以鄉三物教萬民而賓興之其所以納民軌物之道
不外六德六行六藝得人之盛陵轢夏商洙泗傳經注重倫理舉凡父
子之親朋友之義咸知聖教之尊其收效之良歷漢晉唐宋明清如出
一轍洎前清末葉政等絲棼其弊由於內滿外漢任用僉人並非學術
乖違所致民國肇興嚮言簧鼓謬謂尼山學說不適用於今世潮流於

是學校新章尙平等而競強權輕經訓而重科學究之技能嫻熟經學
荒蕪美術擅長文藝退化馴至父子平權家庭革命以蔑倫爲幸福以
放縱爲自由此南京留守黃興所以有振興八德之舉也今幸當軸覺
悟一變方針課程趨重經書論說概用文理潛移默化不難牖啓良知
從此士恢復德人淪新機矢西哲堅忍之心雪病夫頹唐之恥民國前
途庶有夥乎

學宮

縣治儒學在城內東南隅明時爲寧遠衛學宣德五年都指揮劉斌始創衛治洎總兵巫凱奏請分廣寧爲二衛設立學宮規模稍具景泰四年都督焦禮與同事諸人捐貲重建清康熙二十二年奉天府尹高爾位捐俸修葺三十六年知州李文熙再修有奉天學政余泰來所撰碑記可攷乾隆三十五年知州克陞額捐廉增修道光二十七年知州強上林募捐續修光緒十三年知州朱克揚募捐續修民國十三年邑人前直隸省長兼督理王承斌獨力捐修煥然一新均有碑記可考

大成殿三楹東西廡各五楹殿前拜臺闊大甬路增寬西廡之南建焚燎所一戟門三間門外左名宦祠右鄉賢祠祠各爲一院別以圍牆再

南有泮橋一座周建石欄再南則左爲更衣亭右爲祭器庫各三楹再南則櫺星門一座式如碑樓兩傍各設角門櫺星門外碑六爲兩亭以蔽風雨左禮門右義路門外左右建石質下馬牌各一大成殿後有界牆一道中設祠門左右各設角門正殿三楹即

崇聖祠康熙二十五年御製聖贊頒布天下勒石學宮嗣頒御書萬世師表匾額立下馬牌於學宮外雍正元年追封五代王爵改

啓聖祠爲

崇聖祠二年詔祀先師以太牢嗣頒御書生民未有匾額乾隆元年奉頒御書與天地參匾額嘉慶五年奉頒御書聖集大成匾額道光三年奉頒御書聖協時中匾額咸豐二年奉頒御書德齊幃載匾額同治三

年奉頒御書聖神天縱匾額光緒二年奉頒御書斯文在茲匾額三十四年升列大祀

崇聖祠薦用太牢宣統元年奉頒御書中和位育匾額悉恭揭

大成殿以誌景仰民國三年八月頒定祀孔典禮改稱

文廟爲

孔子廟一如古制近復增置法器式煥新儀古禮庶修明歟

附櫺星門攷

孔廟之設櫺星門久矣究其意義聚訟紛如或曰櫺本作靈西漢時始祠靈星祈穀孔廟爲祭祀而設故應先設靈星也或曰櫺楯間子也闌厠爲方格於橫直交處爲圓子如綺文玲瓏因其門形如櫺故舉而名

之也或曰宋禮志天聖六年築南郊壇置櫺星門厥後理宗時始移用於孔廟蓋例聖於天尊之至也其實孔廟之設櫺星門蓋以天鎮星主得士之慶其下爲靈星之神（說詳龍魚河圖）今莘莘學子非孔子無以陶成故以得士之豐功歸諸至聖也然則櫺星門之設儼如爲發祥多士揭櫟其水源木本而不必紛紛置喙也夫

御製臥碑條約

清順治九年命禮部頒行天下學宮

朝廷建立學校選取生員免其丁糧厚其廩膳設學院學道學官以教之各衙門官以禮相待全要養賢才以備朝廷之用諸生皆當上報國恩下立人品所有教條開列於後

一生員之家父母賢智者子當受教父母愚魯或有非爲者子旣讀書

明理當再三懇告使父母不陷於危亡

一生員立志當學爲忠臣清官書史所載忠清事蹟務須互相講究凡利國愛民之事更宜留心

一生員居心忠厚正直讀書方有實用出仕必作良吏若心術邪刻讀書必無成就爲官必取禍患行害人之事者往往自殺其身常宜思省

一生員不可干求官長結交勢要希圖進身若果心善德全上天知之必加以福

一生員當愛身忍性凡有司衙門不可輕入即有切已之事止許家人代告不許干與他人詞訟他人亦不許牽連生員作證

一爲學當尊敬先生若有講說皆須誠心聽受如有未明從容再問毋
妄行辯難爲師長者亦當盡心教訓勿致怠惰

一軍民一切利病不許生員上書陳言如有一言建白以違制論黜革
治罪

一生員不許糾黨多人立盟結社把持官府武斷鄉曲所作文字不許
妄行刊刻違者聽提調官治罪

欽定六諭文

孝順父母

恭敬長上

和睦鄉里

教訓子孫

各安生理

無作非爲

御製訓飭士子文 清康熙四十一年頒行天下學宮

國家建立學校原以興行教化作育人才典至渥也朕臨御以來隆重師儒加意庠序近復慎簡學使釐剔弊端務期風教修明賢材蔚起庶幾棧樸作人之意乃比來士習未端儒效罕著雖因內外臣工奉行未能盡善亦由爾諸生積錮已久猝難改易之故也茲特親製訓言再加警惕爾諸生其敬聽之從來學者先立品行次及文學學術事功原委有序爾諸生幼聞庭訓長列宮牆朝夕誦讀寧無究心必也躬行實踐砥礪廉隅敦孝順以事親秉忠貞以立志窮經考易勿雜荒誕之談取友親師悉化驕盈之習文章歸於醇雅毋事浮華軌度式於規繩最防蕩軼子衿佻達自昔所譏苟行止有虧雖讀書何益若夫宅心勿淑行已多愆或蜚語流言脅制官長或隱糧包訟出入公門或唆撥姦猾欺

孤凌弱或招呼朋類結社要盟乃如之人名教不容鄉黨勿齒縱幸逃
梟扑濫竊章縫反之於表能無愧乎鄉會科名乃掄才大典關係尤距
士子果有真才實學何患困不逢年顧乃標榜虛名暗通聲氣夤緣詭
遇罔顧身家又或改竄鄉貫希圖進取嵩凌騰沸網利營私種種弊情
深可痛恨且夫士子出身之始尤貴以正若茲厥初拜獻便已作奸犯
科則異時敗檢踰閑何所不至又安望其秉公持正爲國家宣猷樹績
膺後先疏附之選哉朕用嘉惠爾等故不禁反復惓惓茲訓言頒到爾
等務各體朕心恪遵明訓一切痛加改省爭自濯磨積行勤學以圖上
進國家三年登造束帛弓旌不特爾身有榮即祖父亦增光寵矣逢時
得志寧俟他求哉若乃視爲具文玩愒弗儆毀方躍冶暴棄自甘則是

爾等冥頑無知不能率教也既負栽培復干咎戾王章俱在朕亦不能爲爾等寬矣自茲以往內而國學外而直省鄉校凡學臣師長皆有司鐸之責者並宜傳集諸生多方董勸以副朕懷否則職業弗修咎亦難追勿謂朕言之不豫也爾多士尙敬聽之或

祀典

歷代

漢平帝元始元年封孔子後孔均爲褒成侯奉其祀追諡孔子曰褒成

宣尼公

漢書本紀十二

梁武帝天監四年正月置五經博士各一人分遣博士祭酒巡州郡立

學六月初立孔子廟

資治通鑑一百四十六

北魏太和十六年改諡宣尼曰文聖尼父告諡孔廟

魏書本紀七下

後齊制新立學必釋奠禮於先聖先師每歲春秋二仲常行其禮

隋書禮儀志九

隋制國子寺每歲以四仲月上丁釋奠於先聖先師州郡學則以春秋

仲月釋奠

隋書禮儀志九

隋文帝開皇時贈孔子爲先師尼父

闕里志

唐太宗貞觀二年左僕射房元齡等建議武德中詔釋奠於太學以周

公爲先聖孔子配享臣以爲周公尼父俱稱聖人庠序釋奠本緣夫子

故晉宋梁陳及隋大業故事皆以孔子爲先聖顏回爲先師歷代所行

古今通允請停祭周公升孔子爲先聖以顏回配享從之

文獻通考四十三

貞觀四年詔州縣學皆立孔子廟

新唐書禮樂志十五

貞觀十一年詔尊孔子爲宣父

同上

高宗永徽中復以周公爲先聖孔子爲先師

同上

顯慶二年太尉長孫無忌等議曰仲尼生衰周之末拯文喪之弊祖述堯舜憲章文武宏聖教於六經闡儒風於千世故孟子稱生民以來一人而已自漢以來奕葉封侯崇奉其聖胡可降茲上哲俯入先師今請改令從詔於義爲允（貞觀爲詔永徽爲令）其周公仍依別禮配享武

王詔從之

文獻通考四十三

顯慶三年詔先聖廟用宣和之舞

同上

乾封元年追贈孔子爲太師

同上

咸亨元年詔州縣皆營孔子廟

新唐書禮樂志十五

興城縣志

卷四教育

八